

續

藏

書

續藏書卷十二目錄

內閣輔臣

楊廷和

梁儲

楊一清

費宏

張孚敬

席書

徐階

趙貞吉

續藏書卷十二目錄終

續藏書卷十二

內閣輔臣

太保楊文忠公

楊廷和字介夫四川新都人父春湖廣提學僉事廷和成化十四年戊戌進士改庶吉士十六年授翰林院檢討弘治二年歷修撰陞侍讀九年進左春坊左中允十六年陞左春坊大學士兼翰林院侍講學士十八年命同太常寺卿兼學士張元禎爲會試考官取董玘等三百人尋陞詹事府少詹事兼翰林院學

士正德元年進詹事仍兼學士二年三月陞南京吏部右侍郎初武宗御經筵講書故事講書義畢必獻規諫之語是日廷和同學士劉忠講罷上謂劉瑾曰經筵講書何故添出許多說話瑾奏曰此二人當打發他南京去乃陞二人南京侍郎是時南京無缺皆添註五月陞南京戶部尚書十月改戶部尚書兼文淵閣大學士入閣辦事三年八月加少保兼太子太保五年二月進吏部尚書兼武英殿大學士九月加少傅兼謹身殿大學士七年十月進少師華蓋

殿大學士九年正月上疏請視朝御經筵罷邊兵西
僧市肆等項奉 旨早朝深居朕自處治經筵等項
已有成規邊兵只照前 旨市肆常理西僧舊制俱
不必動十年二月疏請重視朝嚴宮禁三月以憂去
十二年十一月服闋大學士梁儲請遣行人起廷和
復入內閣而已遜居其下十二月 上巡邊廷和言
北虜不時出沒正統末年可爲明鑑不報十三年六
月 上復議北征廷和諫萬乘不宜輕出 上又自
稱威武大將軍令內閣草 勅廷和等又諫俱不聽

十五年、廷和同大學士毛紀上疏、謂大祀之禮、在正月、社稷之祀、舉在仲春、孝貞皇后大祥、在二月二日、禮應卽時祔廟、今俱改卜至再、天下朝覲官員、吏部考察上請、未奉定奪、各官離任既久、政務悉廢、殿試進士、亦已踰期、自去秋聖駕南行、至今八月有餘、在京在外各衙門題奏、俱未蒙發、伏望亟賜班師還京、舉行前項大禮、并各衙門題奏文書、不報、十六年三月、武宗不豫、廷和等密請太后懿旨、誅江彬、籍其家、會世廟將至京、廷和請由東安門居文

華殿上箋勸進擇日登極。上。真。聖。明。之。見。命從行殿受箋由大明門入日中登極初儀制郎中具儀注途啓上謂長史表宗皐曰遺詔以吾嗣皇帝非爲太子此所具儀何謂也會命議興獻王主祀稱號尚書毛澄請之內閣廷和檢文獻通考漢定陶王宋濮王事授之曰是足爲據異論者卽奸邪當斬七月進士張璠疏論繼統繼嗣不同力詆朝議之非上令送至內閣廷和曰秀才焉知國家事體復持入頃之召廷和等入論曰至親莫如父母因授以手勅曰卿等

所言俱有理、但朕罔極之恩、無由得報、今尊父爲
興獻皇帝、母爲興獻皇后、祖母邵氏爲康壽皇太后、
以伸朕爲子之情、廷和等退而上言、禮謂所後者爲
父母、而以其所生者爲伯叔父母、蓋不唯降其服、而
又異其名、臣等不敢阿諛順旨、仍封還 手勅、旣而
御批復加 興獻帝后皇字、廷和等復封還 御批
曰、若加皇字、是忘所後而重本生、任私恩而棄大義、
臣等不得辭其責矣、願罷歸、上曰、卿等所言皆大
義、朕奉昊天至情、不必拘於史志、可勉錄皇號、廷和

等倡九卿翰林科道連章劾張璫邪說願乞罷斥不報嘉靖元年壬午春以翊戴功加伯爵廕一子爲錦衣衛指揮使辭免仍加錄廕二年二月以少師十二年考滿奉手勅楊廷和輔翊朕躬勲勞懋著特加太傅不拜三年二月以議大禮忤旨致仕後削籍爲民

國琛集云武皇南巡天下洶洶倖臣竊國柄有狂生上書數其過公延禮狂生泣下曰久當不負良規已而武皇崩於豹房安危俄頃禁從兵悉屬江彬

公密與太監張永謀啓太后請旨誅彬先傳令散軍士各就賞所彬覺顧瞻無人遂就擒乃定遣迎今上禮下詔紀元釐正國條裁革傳乞陞及濫役月省食糧一十六萬餘

永史云戊申命禮官議崇祀興獻王楊廷和出漢定陶王宋濮王事授禮部尚書毛澄曰是禮良正異議者以奸諛誅時有舉人張璫者禮部侍郎王瓚同邑人也詣瓚言帝入繼大統非爲人後與漢哀宋廢株科瓚宣言於朝廷和惡之嗾言官論列調南京

而以學士汪俊代之。又云尚書毛澄會公卿等六十餘人上議。漢成帝立定陶王爲嗣。而以楚王孫後定陶師丹善其合禮。今上宜以孝宗爲考而稱興獻王爲叔。又以益王子崇仁王後。興獻稱考而顧稱益王爲叔。帝曰父母可互易。若是邪。其更議。大學士廷和蔣冕毛紀復言程順濮議最爲得體。

興國祀事暫屬崇仁王。俟皇次子生復承王後。情理允愜。廷和復言。舜不追崇瞽瞍。漢世祖不追崇南頓王。願皇上取法二君。以光聖德。又云聖母至通。

州禮部議由東安門入不聽復議大明左門入亦不聽斷由中門入謁太廟舉朝以爲不可帝命錦衣衛以母后儀駕及製太后法服以俟聖母聞朝議欲考孝宗志曰安得以吾子爲人子詰從官曰爾儕已極顯榮獨不爲獻王地乎胡尊稱至今未定也因留通州不入帝聞之涕泗號泣啓慈壽皇太后願避位奉母歸藩羣臣惶懼不知所裁又云張璁作大禮或問辯繼統繼嗣之異以遺內閣不聽乃上之兵部主事霍韜同知馬時中監生何淵巡檢

房濬各上言禮官持議之非留中廷和知勢不獲已
乃草勅云奉 慈壽皇太后懿旨以朕本生父興獻
王稱興獻帝母稱興獻后 憲廟貴妃邵氏稱皇太
后仰承 慈命不敢固違 上允之又云給事中熊
浹疏言 皇上貴爲天子聖父聖母以諸王處之于
禮安乎臣謂尊稱必以帝后而祀於列廟則大統之
義本生之恩庶爲兩全費宏以浹爲鄉人恐廷和疑
已乃出爲湖廣叅政又云 帝下張璉所進大禮或
問於禮部廷和授旨吏部尚書喬宇選爲南京刑部

四川司主事諭之曰、南中非子所宜、奈何以大禮相
厄也、尚書石琚語璉曰、行矣、慎之、大禮議久當見用
耳、而楊一清亦云、張生此論、聖人不易也、又云、郊祀
甫畢、清寧宮小室火、楊廷和言、火發風迅、且迫清寧
後殿、豈興獻帝后加稱祖宗神靈、或有未協者
乎、給事中鄧繼曾言、五行于火主禮、火失其正、廢禮
之應也、主事高尚賢等亦各上疏、帝心動、乃勉從
廷議、稱孝宗爲皇考、慈壽皇太后爲聖母、興
獻帝后爲本生父母、不稱皇、又云、上諭興獻帝

冊文朕宜稱子廷和曰不可復諭宜稱孝子廷和曰
宜稱長子廷和令禮部侍郎賈詠題主題曰興獻
帝神主不稱考亦不稱叔不著子名遣太監及成國
公詣安陸上尊號又云太后邵氏崩后憲宗貴
妃也生興獻帝尊爲壽安太后楊廷和議哭臨一
日十三日除服移文南京不布詔帝不從命以二
十七日丙寅禮官請素服御西角門帝曰朕哀慕
方切安忍爲此十二月甲戌帝勅禮部曰祖母
壽安皇太后夙事皇祖誕生興獻帝肆致眇躬

入承大統方隆帝號期享遐齡孝養未終奄忽違棄
追唯懿德宜有尊稱上尊號曰孝惠康肅溫仁懿順
協天佑聖皇太后又云帝遣內臣之蘇杭織造工
部言地方饑饉不必遣官及科臣章僑等各諫止不
聽命廷和撰勅廷和疏言蘇杭諸府四月以後亢陽
爲虐入秋以來霖雨不止饑窘非常正供不給淮揚
徐邳田廬漂沒幼稚計斤而鬻母子墜水而歿若更
重以織造恐激他變勅書必不敢草上怒其違抗
切責之廷和遂移疾乞休允之科臣葛鴻奏乞慰留

不報。又云：帝命費宏監修大禮全書，已而易名明倫大典，以一清璫等監修。至是書成，加璫少傅、太子太傅、吏部尚書，謹身殿大學士。久之，帝享太廟，數目璫，賜以御詩及肖衮衣。勅曰：大學士楊廷和、謬主濮議，尚書毛澄不能執經據理，蔣冕、毛紀轉相附和。林俊著論迎合，喬宇爲六卿之首，乃與九卿官交章妄執。汪俊繼爲禮部，仍主邪議。吏部郎中夏良勝脅持庶官，望遂邪志。何孟春以侍郎掌禮部，鼓舞朝臣，伏闕喧呼。朕初見道未明，三更詔令，而大禮始定。

然不欲已甚姑從輕議廷和爲罪之魁以定策國老
自居門生天子視朕法當僂市特寬宥削籍爲民毛
澄林俊旣病故各奪生前官職蔣寬毛紀喬宇汪俊
已致仕各奪職閑住何孟春情犯特重夏良勝釀禍
獨深俱爲民其餘兩京各官附名入奏或被入代署
而已不與聞者俱不問其先已正法典編成爲民者
茲不再究禮部大書揭諸承天門俾在位者咸知警
省

趙文肅曰唯皇天篤我明之祜間出哲臣爲社稷

隸二百年間如仁和于公暨新都楊公乘所遇時力
於隸事最著矣蓋正統己巳土木北狩正德辛巳威
武南征隕空沉陸變起非常非有握補天之器挾移
斗之能安敢授手其間哉于公已表於憲皇之世
楊公之沒久矣頃者恭遇我皇上奉我世宗皇
帝遺詔復公之官加贈太保謚文忠廕一孫爲尚寶
司丞一孫入監遣官祭葬恩數備至嗚呼休哉不忘
臣下之勞其國家有道靈長之福乎於是始皆談
誦公行事矣噫公希世之英也按公系出湖廣之麻

城五世祖避亂入蜀居新都以天順己卯九月十九
日生公幼以奇穎舉於鄉少年讀中秘書才器恢廓
鄉先達司馬余肅敏夙重之歸老之日獨持大明律
與別曰介夫當相天下爲我熟此以助他日謀斷蓋
居館三十年修文講讀聲譽茂藉時輩視之已若麟
角鳳毛然正德丁卯冬自南戶部尚書同長沙李公
辦閣事是時孽喘之焰毒蒸寰宇數年內駭奔未息
南平北討政府囂欲而長沙亦倦念去欲令公代已
也嘗語人曰吾於文翰有一日之長若經濟事須歸

得一代一而後可去

介夫夫余公識公於早歲李相察公於同事非楊氏
之鮑叔哉壬申冬李去公始獨任時公丁憂朝議奪
情疏亟上議得寢唯令撫按官與坐守長隨刻服制
日促上道此起用輔臣之異數也噫公再起而時事
益難爲矣武皇帝匹馬捶居庸關踰上谷入雲中
望獵陰山旋以威武南下則五位虛拱將踰歲矣嗟
嗟自宸濠播亂訛言載路包藏禍心者可盡防禦人
心將渙大勢將傾仕者詠同車之招居者懷恤緯之
憂此何等景象邪公血誠隻影周旋其間達奉綸

音近承 慈旨大合衆謀小事獨斷竟俾邊無鳴鏑
衢寡驚柝安平且泰俟 上之回嗚呼可不謂公勞
已乎 太駕至自通州事勢愈急四家銳卒環布蕭
密梟獍在側磨牙談舌儻機事有一髮之類則禍不
測可忍言邪嗚呼危哉公外示安徐密祈 內旨許
其從事始以一刺給彬入賀獸吻縛之按押虎之機
此蕭張擒信之智也旋以優賞犒思歸官卒令掃迹
出關成逐羊之勢此周勃收軍之勇也軍收而司農
之印可不倒矣信擒而郿塢之臍可不焚矣嗚呼可

不謂公功已乎、然後清官警道迎。真主開明堂而治之、布明詔與天下更始、而天下大定矣。嗚呼、可不謂公忠已乎、當是時、公之勲名著矣、風烈高矣、尊親議起而事之大難處者亦隨至矣、公嘗歎曰、衆尤交責、吾何逃乎、義之尤我命也、人之尤我遇也、事之尤我時也、吾唯有去已耳、夫以公之圓機達識、豈不知詔者上之令也、不便雖十易之、孰禦、特以處君父骨肉情理之間、身任兩宮之責、豈敢操一切徑情之說乎、必推心挈度、劑量而調適之、以和無體之至禮。

保忘名之完名侯。秦陵掃宮役作而徐圖其後。豈盡晚哉。然欲卽以回執禮正名之論。則勢不可也。豈非命哉。公之決于去。所以免義我尤也。往在漢廷博議。是者不以加秩。負者不以奪楮。據經研義。非擊搏之司。是當求裁無減異之厲。四子之於公。獨異是乎。豈非遇哉。公之決於去。所以免人我尤也。世復有不齊之論。出於意見之偏。錮于習聞之久。附聲和響。齟齬寔繁。徒致聖主懷怒。疑有諷喉罪。且不測。豈非時固然哉。公之決於去。蓋以免事我尤也。夫以公之

功勞靖忠而博此三去惴惴焉懼補過之無地人臣之道豈易盡哉悲夫傳稱公幼讀書日以卷計長於學無不貫唯以資經濟故於當代典章條格人才政蹟邊防阨塞軍伍錢役叢瑣遠邇心計耳濡如身親周旋而抵掌可述酬答機務之際殆裕如也張永以東厥功乞封已持內旨引內官劉馬兒例要公公曰劉以功封其族人非封自身也事載岳公類博根、據稿中取示之乃已其談笑解紛易易如此而不知由於宿昔之精博也至當大事智勇奮溢臨九歿而不

回此則非人易及亦非可易測者矣初輟草威武勅已瀕死逮嗣君未至承制專斷者廿七日駕抑奸雄如泰如瓊稍踈皆足以死新詔裁革人數十四萬八千七百餘歲省太倉粟一百五十三萬餘怨者洶洶謠曰終日想想出一張殺人榜於是公出入護以衛士益岌岌隣歿矣然而不歿也者才也亦忠也有默相者耳公閣僚廣東梁公之論曰天生斯人以了今日之事大匠之任不可代也於是虛閣中首席俟公起復至而居之斯則公未卒而論已定故公少

時嘗夢天門開遙瞻阜楔曰際昌時而公顯其老也
復夢天門開有二幡導公冉冉以去而公卒公殆天
人稟間氣而生者邪公在位一辭伯爵及太師太傅
二辭錦衣衛千戶廕三辭文職四品世襲廕位極人
臣而居處同於寒素顧濟物之心則拳拳無時已也
公生多宦遊每歸則爲鄉人建一惠局初通水利灌
涸田萬頃鄉人德之號爲學士堰次捨建坊牌費以
修縣城城成而賊至完生命者萬計次置義田于城
西北以贍族人蓋三歸而修創利業三焉若他言行

之詳當有如王巖叟馬永卿輩書之未易舉也

支大綸曰大禮之議肇於永嘉而席桂諸君子和之
倫序昭然名義甚正自無可疑廷和上畏 昭聖下
畏人言力主濮議諸卿佐復畏廷和之排擊附和雷
同莫敢牴牾其伏闕諸少年尚氣好名以附廷和者
爲守正以附永嘉者爲干進互相標榜毒盈縉紳皆
當國者不善通融耳然以冲齡之主而舉朝元老卿
輔至二百餘臣皆喧呼慟哭卒不少動聖孝天植神
武獨斷萬古一君而已

李禿翁曰。世廟初入。擬古執禮。公當其時。可謂正。直不阿。卓然名世矣。是豈賂瑾。賣友取容之人乎。此市井之談。愛憎之口。不待辯者。獨大禮議起。人皆是張桂。而非公。予謂公只是未脫見聞窠臼耳。若其一念唯恐陷主於非禮。則精忠貫日。可掬也。故謂公之議有所未當。則可謂公之心有一毫不思。則不可。此趙文肅所以極力爲公表也。善乎鄭淡泉之論曰。康陵時。劉公鞠躬盡瘁。以匡其始。楊公撥亂反正。以扶其終。或去或不去。均之爲大臣。其言當矣。果如或。

者之說於司直爲賣友於劉瑾爲阿勢則大禮之議
委曲扶同公自優爲之矣然公之議大禮也可以許
其忠而未敢以許其妙若處康陵之朝非但人不
知其妙而亦不能信其忠蓋大忠者不見忠至妙者
人自然不知其妙也是以當時知公者僅僅有李文
正梁文康費文憲數人耳文正必得公而後敢以去
梁費二公亦必得公而後敢卽安則公所係何如哉
予又怪其不能以事康陵者而事永陵也豈其
真挾定策之功或恃世宗仁聖終能聽已也邪不

知之矣、

太師梁文康公

梁儲字叔厚、廣州順德人、別號鬱洲居士、晚更號厚齋、成化戊戌會試第一、廷試第二甲居首、改庶吉士、十六年授編修、二十二年兼司經局校書、侍廟於東宮、日進講讀、丁未充會試同考官、旋丁內外艱、弘治辛亥服闋、進侍講、與修憲廟實錄、成進司經局洗馬、壬子主考順天鄉試、復侍武宗東宮講讀、戊午主試應天、是歲冬冊封安南國王、充正使、庚申九年考滿、遷翰林學士、辛酉再主試順天、壬戌奉

詔教庶吉士與修大明會典書成進少詹事仍兼學士本年遷吏部右侍郎奉命充正使冊封魯藩正德改元詔纂修孝廟實錄及會典俱爲副總裁遂轉左侍郎明年遷吏部尚書兼學士專典誥勅掌詹事府事又明年戊辰主會試時逆瑾竊權專恣有不附已者輒以計去之乃指摘會典紕繆貶爲吏部右侍郎實錄成復尚書兼職如故瑾憾公不置拮據媒孽俄有旨調南京吏部尚書加太子少保五年瑾敗召復官兼文淵閣大學士典機務既至進武

英殿大學士、加少保兼太子太保、尋進少傅兼太子太傅、謹身殿大學士、廕一子錦衣世千戶、公辭、改尚寶司丞、又辭、改中書舍人、又固辭、弗允、甲戌、再主會試、凡六司文衡、六年考滿、進少師兼太子太師、華蓋殿大學士、先是、石齋楊公首秉朝政、以父喪去位、公言于武宗、敕遣行人慰諭、命有司卽其家督促上道、楊公至、公遜居其下、士論多之、武宗之將幸宣大也、楊石齋暨敬所蔣公皆在告、中外洶洶、莫敢先發、公與東萊毛公泣諫於左順門內、旣而毛公亦在

告公獨廷爭累日不得命陝西親藩有請良田爲牧地錢寧江彬及宦官張忠輩受重賄請上許之兵部及科道交章執奏謂太祖高皇帝有禁茲田不得畀藩封上曰朕念親親與之勿爲間言大學士楊廷和蔣冕皆引疾不出梁儲曰公等皆托疾如國家事何是時上怒甚令內臣督促草制制詞在後儲承命上制草上覽制駭曰若是可虞其勿與事遂寢會上自稱威武大將軍鎮國公朱壽巡邊令內閣草制大學士楊廷和同儲力諫不聽屢使促勅廷和稱疾

不出至是、上御左順門面促儲、儲不敢草、願就、
上釋之時、禮部尚書李遜學等廷議建儲、居守、朱寧
陰受寧王宸濠賄、謀入寧王世子江彬、亦欲立、所厚
遠藩、儲大聲曰、皇上春秋鼎盛、建儲未宜、輕言萬
一有他、吾輩伏斧鉞矣、王瓊、王鴻儒亦助言之、議遂
寢、已卯、考一品九年滿、進階、特進、光祿大夫、勳、左柱
國、兼給、誥、命、褒、諭、賜、譙、禮部、會、江西兵變、大駕
南征、公與蔣公扈從、至南都、凡七請回鑾、不報、時
且郊、公與蔣公疏言、兩都郊祀、祖宗配位不同、乃

不果郊遂定議北歸然尚未有期公復跪請於行宮西階中使傳諭再四公弗起得報乃起庚辰冬至德州自劾請罷不允抵京再疏又不允儲乃杜門求歸言妻喪未葬先塋未修老病之軀無所陳力武廟固留遣官爲治葬事葺先人墓而賜祭遂與羣公同受遺命策世廟自興邸入正大統儲與寃實奉行勸進事稍定復申前請旣而外議謂儲黨逆濠復護衛儲默不辯攻詆者縷縷儲乃復固申前請上始可其奏賜勅特遣行人送歸命有司月給廩食歲

致興隸蓋辛巳夏五月也公歸日與弟叅議君億徜徉山水間嘉靖乙酉秋上念定策扈迎功唯儲未錄詔賡子世錦衣衛指揮公疏辭上重違懇誠報可而遷均輔爲尚寶司丞公疏陳謝慰勞有加丁亥三月二十五日公卒享年七十有七贈太師謚文康諭祭九壇遣官營葬公沉重博雅接人和易立朝四十餘年議論每持忠厚故羣邪用事公從容其間若履坦途所著有鬱洲集藏於家

霍韜撰公傳曰公立朝四十年其功多矣乃自掩蔽

不肯以功自誇，故人不得知。公聞謫，不辯，故謫言曰：「積平生好施德於人，人或賴公以自庇，反操戈向公，故海內後進之士未嘗面公者。」徒聞謫公云云，亦附和而毀公也。正德間，秦王請陝之邊地以益封壤，嬖臣江彬、朱寧及宦官張忠皆助爲之請。武皇帝詔與之，兵曹及科道各執奏不可。武皇帝曰：「朕念親親與之，勿拒。」大學士楊公當草制，曰：「若遂草制，異地秦藩恐貽後虞。」執不草制，則忤帝意，遂引疾不視事。大學士蔣公亦繼引疾。武皇震怒，內臣督促公。

承命草上制曰昔太祖高皇帝著令曰此地不界
藩封非吝也念此土廣且饒藩封得之多畜士馬饒
富而驕奸人誘爲不軌不利宗社今王請祈懇篤朕
念親親其畀地於王王得地宜益謹毋收聚奸人毋
多畜士馬聽狂人勸爲不軌震及邊方危我社稷是
時雖欲保全親親不可得已王其慎之毋忽武皇
帝覽制駭曰若是其可虞其勿與回天之力決於數
詞偉矣哉正德己卯武皇帝欲自巡邊乃稱威武
大將軍詔宰臣草威武大將軍勅大學士楊廷和蔣

冤皆引疾。武皇帝御左順門召儲儲奏曰臣不敢
草勅。帝震怒手劒立曰不草勅齒此劒儲免冠解
衣帶伏地涕泣曰臣有罪今日就死他日陛下猶
憫臣若遂草勅他日陛下覺而怒曰儲無禮以臣
名君臣罪不可赦。武皇帝廼察其誠欵擲劒起不
促草勅矣。巳卯宸濠反。武皇帝欲親征乃議楊公
居守梁公蔣公皆從。武皇帝至南都議郊儲與寬
奏曰南都郊。仁祖皇帝配天北都郊。太祖皇帝
太宗皇帝配天若遂郊配位不知所裁。武皇乃不

郊、又將南幸、儲冤手執章奏、跪行在門外、自卯至酉、汗浹背、武皇帝遣內臣諭起、對曰、臣未奉俞旨、不敢起、武皇帝乃諭曰、不南幸矣、儲冤乃起、始宸濠未反時、凡所餽皆有記籍、濠誅後、閱籍、唯厚齋梁公晉溪王公無受餽、世人猶指此以疵二公、未見此記籍耳、廣郡沈同知尚經曰、順德南海番禺梁厚翁田無百畝、所有者香山浮坦、從化賊巢、瘦敝不食之土耳、世人乃以辭受之濫疵公、韜故著此、以俟篤論之君子云、晉王御史溱請典刑公、田給事賦公門人也、

請沒公貲以代天下輸租之半、劉瑾遂矯詔抄公家、公在南京初報聞、色不動、今上御極、言官聯疏劾公、假宸濠衛兵、是爲故縱反者、請召置獄正罪、如陸尚書完云、公曰、余唯致仕去而已、終不肯辯、人曰、是公大罪、何所容辯、公終不辯、而劾者不已、久之乃知與宸濠衛兵者非公實、石齋楊公當制、正德九年三月十五自之爲也、蓋舊例凡閣下當制、擬旨人親署銜著筆跡、故不得而誣也、公唯引罪、連三疏乞致仕、無片言自明、然後知公之爲大矣、

黃佐撰公傳略曰、蔣冕方在庶寮、公延譽官府、力拔爲輔、御史西安張璉論列、詆毀人不能堪、而儲引歷往謝、立意薦揚、竟至大用、璉終身感之、時楊一清在內閣、親承聖諭、命撰勅召用、而計音至矣、

太保楊文襄公

真經
濟才

楊一清字應寧雲南安寧州人幼以奇童薦入翰林
憲廟命內閣選師教之受業於黎文僖淳年十四中
順天鄉試時已抗顏爲人師有文中子之風矣登成
化八年壬辰進士授中書舍人二十三年擢山西提
學僉事丁憂服闋補陝西提學副使自弘治四年至
十一年凡八年在陝大作士類士有博記誦者修文
辭者專攻舉業者所學不一皆誘而進之三邊學多
士廣歲必一試雖僻壤不遺也其蒞事愈久愈嚴夏

楚之用若無虛日士試凜凜守法莫敢左右顧及去
任士追憶往事凡中才已上可貢可舉者未嘗一朴
及之性明知人方進取日或許以將來科第及冠世
名世必卒如所言故其造士五十餘年猶用不盡當
是之時雖宗室不能奪生員之婚雖撫按不能撓課
試之權爲國朝提學之最久乃召爲太常寺少卿
至十四年轉南京太常卿壬戌虜火節入寇馬政廢
弛遷右副都御史督理茶馬十七年清出荒熟牧地
凡十二萬八千四百七十三頃餘奏准每年於陝西

按察司揀用憲臣一員，于臨洮府駐扎，巡禁茶馬。又奏准選取都布按三司官三員，專候委任，及添注鞏昌平涼府同知官，不時聽委。十八年，又題准招商自出資本，買茶裝篋，轉運茶司，每一千斤價五十兩。大約計官銀萬兩，舊買馬不過千匹。若此，可得馬幾三千匹，其利在官，與開中商茶不同。至今以爲便。甲子虜賊大舉，大司馬劉大夏薦爲陝西巡撫，兼經理邊務。一清上疏陳邊事，劾罷總兵武安侯及兵備不職者數人，請釋緣事守備楊宏，使自劾。裁抑鎮守中官。

支應歲省數千金創城平虜紅古二處以援固原築垣頻河一帶以捍靖虜虜遂不敢渡河己丑冬虜數十萬人寧夏乘勝直抵固原一清率帳下五十餘人趨會總兵曹雄衆遮道爭謂不可以謂平涼一路絕無行人叅政安惟學曰公行何恃一清不荅徑去賊聞一清至遂掣衆北走在陝未踰年百務具舉正德改元朝廷以邊患方熾兵權大分命總制全陝三邊軍馬一清以寧夏花馬池係要害地虜數由以入率官屬沿邊巡視議處方略上疏極陳戰守之策修

濬垣塹以固邊防、增設衛所以壯邊兵、經理寧夏以
安內附、又上四事、復上六事、丁卯忤劉瑾、歸休丹徒、
復逮詔獄、賴大學士李文正救免、庚午、慶藩寘鐫叛、
起爲總制、靈州土人素苦漢官科雲、一清昔時多所
釐革、已復踵舊、至是紛相訴訴、一清以大亂之後、但
除其害、而不深究其人、閱舊築邊牆、自紅山橫城高
厚堅完、儼然巨障、念成功之甚難、歎前志之未遂、感
而賦詩、有老去寸心猶不灰、仗誰經略了餘忠、復入城、
訪求各營衛部領之賢否、而更置之、謂邊軍之困本

由科差煩重而私役買閑爲弊居多屯軍地去糧存
逋逃萬數而湖地草灘半爲將領所據反役軍采取
以自封殖於是鎮守太監弼及總兵楊英仇鉞遊
擊史鏞監鎗少監馬良等各退出役占軍士楊英又
將所收草灘湖地呈退三之二鉞以下各退有差乃
行巡撫將本鎮馬步軍士稽查實數造冊在官凡有
征調全隊以出一切雜差循次撥用毋得脫者又通
行各城堡一體查處禁革條陳地方急務十數事上
奏其大者如乞旌罵賊而處都指揮楊忠李睿逃難

而殞百戶張欽等門閭仍廕其子以勵臣節皆與劉瑾意忤一清又奏總兵楊英喪失之餘士心不附乞將英取回調用薦副總兵仇鉞叅將保勘遊擊將軍史鏞是時延綏鎮巡奏欲因燒荒會諸鎮兵搜索河套零賊一清上疏以謂漢中流賊未平調去沿邊官軍數多邊城空虛邊儲缺乏而河西達賊屢肆搶攘况河凍後達賊入套各鎮兵馬正當蓄鋒養銳以俟今乃無故出境搜索縱得數輩老弱殘敗餘寇何補于事而往回動經旬月糜費糧料傷損馬匹所得不

償所失。且舍門庭侵犯之虜。而尋伏藏。迺難之賊。取笑外夷。又遺書當道。極論其事。竟寢不行。蓋瑾素憾一清。特以事變倉卒。不得已起用。旣平復。悔乃矯詔改一清專在寧夏撫馭。實陰奪其總制之權也。無何瑾誅。衆但知瑾之誅爲張永所發。不知永實受美于一清。遂成之耳。踰月。召爲戶部尚書。尋加太子少保。辛未。順天應天山東河南盜起。一清疏上十一事。上嘉納。改吏部。起廢拔幽。凡爲逆瑾所構陷。連茹以起。江西盜久未平。薦按察副使吳廷舉。山東盜日熾。

又疏陳戰守撫馭賞罰機宜下兵部檄諸鎮施行及
劉六劉七等聚衆數千充斥近圻兵部尚書王敞東
手無策一清遂推用大將征討及文臣有才望者提
督軍務又著令有能擒斬盜賊三名願者陞一級大
學士李東陽從中票旨極其褒美悉從所言施行都
御史馬中錫提督軍務惠安伯張偉爲總兵官同征
流賊馬張不知兵專主招撫賊盜放縱大肆劫剽渠
魁劉七屯兵近圻要請赦宥廷議將從之一清獨執
不可曰中原百姓敢稱兵熾亂罪在不赦宜易將增

兵殄滅乃已。命太監谷大用總督軍務，薦侍郎陸完爲提督。及賊至鎮江，貽書于完，願以拯溺救焚爲念。星馳前去，量帶西北勅兵數千人，半駐江北以爲聲援，半渡江南以備截殺。彭提督仇總兵兵馬亦于南都以東，隨便屯駐防遏。一以壯金陵之保障，一以爲瓜真二壩之防。又思此賊出沒無常，或奔淮陽通海二州，以趨山東。故淮鳳之兵不可撤，山東之地不宜虛。卒之金山之捷，竟如所料云。寇平，加少保，甲戌簡入內閣，以時事多垂，言不盡用。乃因災異而上疏自

劾疏入錢寧銜之遂謝政正德己卯秋宸濠變起一

清以鎮江爲江南首郡此地有備則三吳無虞乃親

居作用

閱城設險出粟賑軍乃調金山鎮海官兵爲外援設

中軍營爲內應故城內外恃以無恐後武宗南征

幸其第宴飲賡歌兩晝夜有導上幸浙江者一清

從容婉諫遂不果行嘉靖四年再起總督三邊卽以

最急且切四事上疏俱蒙擬行及大學士楊廷和蔣

寬毛紀去位再召入閣上以張錦奏遷顯陵事

諭一清對曰地道尚靜體魄宜安山陵既定大事旣

襄無故舉遷恐有他虞况獻皇帝大葬之後陛下自藩邸升爲天子不謂之吉壤不可也乃不果遷初張孚敬桂萼二臣言官多有論列疑一清所授二臣既去霍韜乃上疏毀一清上疑之遂乞歸一清具眼人明於知人若拔仇鉞于列校而寘鐔就擒舉王守仁於庶僚而宸濠受誅錄楊宏於編戎而總兵漕運至於伍文定之首倡義捷喬宇之捍禦留都俞諫之總制江右是皆儲賢于無事之時應用于有事之日靖大變正邦域其有功于社稷大矣

制府禰錄云、公在靈州、人有笑其演管習陣者、公謂予誠書生、不諳軍旅、嘗以古人行必謹、哨探止必修戰備爲法、故每諭諸將曰、無事常如有事、時隄防有事、常如無事、時鎮靜、又念武侯李靖未嘗廢管陣、世無岳武穆、豈可恃野戰以爲能邪、

甌陽謝純撰公行狀曰、安寧州有石淙渡、公凡撰述題識、皆以石淙繫之、故時人稱爲石淙先生、父諱景中、永樂癸卯鄉試、初判霸州、改澧州、遷廣東化州同知、景泰甲戌十二月初六日、生公于化州、天順庚辰、

父乞致仕、携公便道、訪前母劉氏家于巴陵、壬辰、公登進士、癸巳、以外艱解官、訪姊氏于丹徒、會公前室段氏繼卒、二喪不任遠歸、乃葬丹徒、因家焉、公爲山西提學僉事、陝西提學副使、作興士類、連魁天下爲狀元者二人、其以學行功業著聞者甚多、具見于正學書院志及關西政教集、尋薦陞左副都御史、督理陝西茶馬、親歷荒邊、攷求利弊、茶利大興、而馬亦蕃盛、三邊仰給、詳具御史陳講所著馬政志中、會虜賊大舉、司馬劉大夏奏調楊一清在彼、多才好問、有謀

善斷請勅改爲巡撫兼經略邊務勅下公卽率兵禦
之上疏具陳邊事其一切興革計處事宜載西征實
錄中世宗卽位薦起公者凡二十疏詔待缺起
用特先遣官賫勅存問嘉靖四年正月授兵部尚書
兼都察院左都御史提督陝西諸邊軍務命巡撫都
御史卽家敦遣啓行十一月召入閣明年五月陞
見復公吏部尚書武英殿大學士加少師兼太子太
傅御製詩一章賜公卒之期爲嘉靖九年八月十
四日夜四鼓是夕寒風颼颼堂戶閉皆洞開有一卒

過公之門、恍惚見公輿出、騎從旌幟甚盛、卒私念曰、吾聞公病、今將何之、公病起邪、及聞出大市、又遇公如故、天明方聞公歿矣、

李元陽撰公墓表曰、正德初、閩人劉瑾有寵于上、竊弄政柄、公時總制三邊、條列修邊事宜、極有端緒、朝宁翕然稱之、瑾惡公不先白已、內批罷公、公遂引疾去位、瑾怒公不已、下之詔獄、首相長沙李力救得釋、瑾權日益重、鼻息所向、無敢違者、六卿一言不合、輒辱以荷校、敢有乞骸骨去者、中以奇禍相逢禁中、

跪伏不敢仰視國事唯其意指危亂之幾已在旦夕
時公家食日夜籌度不遑寢處五年安化王反寧夏
命太監張永討賊永奏須文臣有智謀者一人同行
召公仍總制陝西延綏寧夏甘涼各處軍務協同討
賊公謂永曰藩室亂易除國家內變不可測柰何永
曰何謂公曰寧夏事不足平非久當有捷報內變事
非公無能爲也永佯若不知纔入陝界果聞仇鉞已
擒賊永見公料事如神促膝問內變事公手畫瑾字
永曰渠日夜在上傍不離上一時不見渠不樂

今其根幹枝葉連結已成。上傷皆彼手目安從得
一言入乎公曰此時已有間可入觀討賊不付他人
付公。上意可知矣言已卽就出二奏與永一言寧
夏事一言內變事囑永曰公班師入京見上先進
寧夏奏。上必就公問公詭言請屏人語乃進內變
奏永曰卽不濟柰何公曰他人言濟不濟未可知公
言必濟顧公言時須有端緒萬一不信公公可頓首
請。上卽時召瑾沒其兵器請。上登城驗之若無
反狀殺奴餽狗又頓首哭泣。上必大怒瑾瑾誅公

大用益矯所爲。呂強張承業暨公千載三人耳。但須得請卽行事。無緩時刻。永勃然作曰。老奴何惜餘年報主乎。已而永入京請見。如公策。上覽奏。至瑾姪劉二漢方面大耳。已謀不軌。遂頓足。卽召瑾入侍。瑾不知已有別旨。差永抄沒其家矣。上命縛瑾下獄。時尚未甚信。及登城閱所抄兵器繩繩不絕。始吐舌。竟誅瑾等。一時公卿士庶方敢出氣。懽聲震天。摘瑾肉而嚼者如市。永乃備言公本謀。與首相長沙李公同薦。公才望公始柄用矣。公七歲能屬文。聰敏絕世。

讀書過目成誦、人欲試其心計、戲取市家日曆、鱗雜米鹽之數、令目一過、輒無遺脫、故六經百氏、無所不窺、官制兵衛、本朝故事、歷歷詳曉、八歲以奇童薦入翰林爲秀才、及中進士、爲中書舍人、結交海內名士、文章日益有名、從學者日衆、如丹徒靳貴同在內閣、太原喬宇爲冢宰、皆執弟子禮、公葬喬自太原至、丹徒持服奔喪、其師友之義何如也、公爲提學、謂都人曰、吾於陝得三士、康海、呂樵、馬理也、後果爲聞人、弘治十五年、劉忠宣言、馬政廢壞、薦公陞副都御史、督

馬、召詣闕、面授勅行、明年、公條上茶鹽監牧事宜、及易主馬吏、奏請輒允、牧事有成、益開水草善地、起城堡廬舍、河湟涼固間、雲錦成羣、十七年、虜入花馬池塞、十八年、勅公經略邊務、兼巡撫陝西禦虜、素畏公威名、聞公至、遁去、改總制三邊兼理馬政、是年、陞右都御史、公上疏曰、陝西各邊邊延綏城堡據險、寧夏甘肅河山阻隔、賊雖侵犯、爲患猶淺、唯花馬池至靈州一帶、地里寬漫、城堡稀疏、兵力單弱、一或失守、虜衆拆牆而入、犯我環慶、寇我固原、深入我平鳳

臨鞏。其間漢土禿處。內變或因之而作。根本動搖。誠非細故。成化初年。北虜在套。彼時未有邊牆。恣肆出入。已而得巡撫寧夏都御史徐廷章修邊牆二百餘里。濬溝塹一道。又得巡撫都御史余子俊修濬完固。北虜知不能犯。不復入套者二十餘年。世平人翫。邊備稍疎。牆旣日薄。溝又日淺。弘治十四年。虜由花馬池拆牆而入。戕破內郡。始蔑我邊牆爲不足畏。連年擁衆拆入。寧夏鎮巡屢奏乞築牆濬塹。提督軍務都御史史琳又乞於花馬池韋州設立營衛。兵部奏下。

總制尚書秦紘、紘止添修四五小堡、及於靖虜至環慶地方挑挖邊塹一道七百里、自謂可無虜患、弘治十七十八年冬、虜復大舉、仍自花馬池、清水營、拆牆深入、紘所修邊塹營堡、不能捍禦、阻遏虜攻、陷清水營、殘破花馬池、上厯宸慮、勅臣經理、臣闇劣、歷官陝西有年、虜情邊事、頗常究心、但腹裏頻年旱荒、倉廩空虛、饋餉不繼、虜賊動號數萬、倏聚忽散、未至而廣徵士馬、則徒費芻糧、既至而調兵應援、則緩不及事、縱使大兵既集、務速則彼或不來、持久則我師先

老恐終無以伐其深入之謀沮其方張之勢常聞防
邊之計莫危於戰莫安於守臣恐坐談不如親見自
慶陽環慶延綏定邊寧夏花馬池興武清水營直抵
寧州一帶沿邊城堡墩臺躬親閱視廣集衆思兼收
羣策叅酌損益始有定論其大要有四修濬牆塹以
固邊防增設衛所以壯邊兵經理寧夏以安內附整
飭韋州以遏外侵但陝西財匱民勞修邊之役人多
異議然而利害有輕重關係有大小大事可成則小
費不足計遠効可圖則近怨不足卹此臣區區犬馬

寸心也。今之河套，卽周之朔方，漢之定襄，赫連勃勃
統萬城也。唐張仁愿築三受降城，置烽戍千八百所。
自是突厥不敢踰山牧馬，朔方無寇，歲省費億計。減
鎮兵數萬，受降遠在河外，古之舉大事者，勞而后佚。
類如此。受降據三面之險，當千里之蔽，正統以來，浸
失其險，舍受降而衛東勝，已失一面之險。又輟東勝
以就延綏，則以一面之地，遮千餘里之衝，遂使河套
沃壤爲虜，甌脫巢穴，其中深山大沙，勢固在彼，而寧
夏外險，及南備河，此陝西北虜之患，所以相尋而莫

之能解也。茲欲復守東勝，因河爲固，東接大同，西接寧夏，使河套方千里之地歸我耕牧，開屯田數百萬，用省內運。不然，則陝西用兵殆無虛日，八郡之人疲於奔命，民窮盜起，禍將何極？及今將延綏寧夏一帶邊防設法整飭，賊來有以待之，雖非上計，尤愈于無策。醜虜聞知，或數十年未敢輕犯，我得休養生息，東勝之議未必終不可復也。世之論邊事者，或專主于戰伐，臣以築牆挑塹爲言，宜必增竝多口，但受公付力處恩深重，自當爲國遠圖。今年套內無賊，腹裏有秋，人

民稍安正可有爲伏望 聖明俯垂省覽下兵部議
勅公經理正德二年公言臣兼巡撫不能專力馬政
瑾惡公公遂去兵部疏言邊務甚急修邊防廢舍一
清無可代者不報乃議上文貴張鼎曹元乞簡用瑾
不欲修邊內批罷役銀鎔大鎚解京由是朔方復套
之議竟中止人謂瑾虜交通欲外亂以濟已私或然
也瑾誅 召公入戶部尚書尋加太子太保十年入
內閣加少傅太子太傅武英殿大學士
吾學編云公生而隱官貌類寺人學博才雄善調停

應變濟務尤曉暢邊事羽檄旁午一夕十疏口占指授悉中機宜又好汲引人人或訾已顧揚薦之一時俊達喜功名者爭趨其門嘉靖二十七年贈太保謚文襄

太保費文憲公

費宏字子充號鳶湖鉛山縣人祖樂庵授五子長珣起鄉薦早卒次瑄起進士官至叅議號復庵復庵宦遊于外而五峰暨弟順庵璵遂主家政宏生而秀異與季叔雪峰瑞相上下復庵喜曰亢吾宗者必二子也携入京躬課督之癸卯甫冠遂與雪峰同領鄉薦甲辰試春官不利卒業北雍時少保丘文莊公爲祭酒少宗伯補庵費公爲司業皆重之丁未舉進士爲廷試第一人授翰林院修撰初宏之上春官也復庵

方以都水主事出治呂梁貽書與宏曰汝脫下第毋
南歸宜入北監讀書丙午代還宏訊曰伯父何以知
宏不策令入北監也復庵笑曰此爾達到之兆也吾
嘗夢汝入北監領班籤籤乃彭文憲公故物文憲嘗
遊北監中狀元矣汝第勉之至是果然是歲八月
憲廟上賓預修實錄庚戌同考禮部試丙辰皇太
子出學青宮首改左春坊左贊善武廟崩服擢太
常寺少卿兼翰林院侍讀丁卯擢禮部右侍郎進左
侍郎時逆瑾竊柄凌轢公卿會瑾敗諸所變更悉皆

釐正唯山東河南陝西山西鄉試解額瑾稍增其數
宏謂求賢國家大典且開科期迫請今科姑聽之俟
後復舊上可之十月陞禮部尚書鑄印局額設大
使副使各一員食糧儒士二名及滿將補投考者不
下數千人請託者半之當事者每難處分宏於食糧
二名外預取聽缺者四人習字者四人擬次第補度
可逾十數年由是投考及請託者皆絕跡辛未十二
月奉旨兼文淵閣大學士入閣供事甲戌二月進
戶部尚書兼秩如故會錢寧入宸濠賄規復護衛宏

執不可有同列嫉宏而覬其位者陰助寧一日忽傳
旨詰責宏因引咎力請退有旨令致仕而從弟翰林
編修案亦罷抵家杜門謝客不敢履城府築樓一區
日課諸子會羣從有與鄉人爲仇者赴愬會城濠知
之招仇家人令裙摠入奏欲以聳動上意奏入下
都察院時大司馬幸庵彭公澤掌院事洞燭其奸旣
駁罷又欲加罪濠知計不行乃嗾羣兇嘯聚奸細焚
略其室廬積聚又侵毀其先墓宏恐避處縣城己卯
六月濠因朝會殺巡撫孫燧及副使許達發兵反隨

遣數十騎趨信圖宏，過進賢，爲縣令劉源清所斬。會王公守仁以羽檄徵兵列郡，信守周朝佐鉛令杜民表等皆率兵往。宏爲贊畫方略，遣人間道致書於王濛平。王欲上聞，時侍御謝君源伍君希儒方隨軍紀功，乃奏曰：「大學士費宏編修宋當護衛之再請也。」昌言明沮已懷先事之憂，及逆謀之旣成也，間道獻策，又急勤王之義。逾年，世廟入繼大統，甫旬日，卽降勅起宏而宋亦召用。時辛巳四月也，甲申五月，進吏部尚書，謹身殿大學士。八月，大同卒叛，殺叅將賈鑑。

巡撫都御史張文錦議者欲遣將出師以討之宏曰
變出于激不叛者固多也討之勝則玉石俱焚不勝
則彼拒城抗命損威傷重甚矣乃議先遣兵部右侍
郎李昆往撫諭以觀其變而以都御史蔡天祐往巡
撫命都督桂勇鎮守其地代還舊總兵官江恒乙酉
武廟實錄成進少師兼太子太師賜宴禮部時弟家
從子懋中皆翰林編修預史事家進左贊善懋中進
修撰丙午六月獻皇實錄成加正一品俸兼華蓋
殿大學士是年累以疾辭上不允丁亥二月疾再

作辭益力。上乃允之。時子懋賢登進士選庶吉士。疏乞歸侍養疾并允之。令疾瘳日照舊作養。乙未四月有旨起用。遣行人王憲芝捧勅催促。宏遂于六月朔冒暑行至七月十二日到京。入閣供職。丙午召見文華右室。賜銀圖書一文曰舊輔元臣。十月十九日陪祀歸。一夕逝。享年六十八。贈太保謚文憲。

太師張文忠公

錢本

張孚敬初名聰字秉用永嘉人別號羅峰弘治丙午
以詩經中省試七上春官始中庚辰會試辛巳世
宗臨軒策士賜進士出身時廷議睿宗獻皇帝尊
號聰上疏爲上明父子之倫語意諄切嘉靖壬午
授南京刑部主事甲申以議禮未決再上疏召至
京廷議陞翰林院學士乙酉陞詹事府詹事仍兼學
士丙戌擢兵部右侍郎經筵講書如舊進謁廟議及
奉安獻皇帝神主禮議丁亥轉左進大禮要略

命開館纂修明倫大典及命讞大獄署都察院事

賜勅獎諭并賜二品服色金帶給三代誥命陞禮部

尚書兼文淵閣大學士照舊纂修勅賜玉帶并銀

圖書二曰忠良貞一曰繩愆弼違理都察院未久奏

革各處濫設鎮守內臣清勘近京皇親庄田戊子加

少保上享太廟回璉侍道側上屢顧賜詩褒美

有貌奇真才傑形端志氣伸予喜荷天貺賚賢作邦

珍之句再賜玉帶璉進姚溪書院集上賜書院

名及堂名命有司于書院中建敬一亭石刻御

註范氏程氏五箴、命註冠服圖成、賜勅并金帛蟒
衣、本年六月、明倫大典成、加少傅兼太子太傅、吏部
尚書、謹身殿大學士、給四代誥命、廕一子爲中書舍
人、章聖皇太后賜諭慰勞、并賜金繒、己丑、命主會
試、尋勅諭重修大明會典、是年夫人蔡氏卒於京、命
禮部尚書李時諭祭、遣員外郎張寰治葬事、八月、以
災異辭准休致、至天津遣行人周澤齋勅守取復任、
仍賜銀記一枚、庚寅、賜明倫大典大學衍義五經四書
各一部、以一品初考、賜勅褒諭、廕一子爲國子生、會

議郊祀成，賜玉帶，尋以名音同，御名請更易，疏再上。上親爲撰名字，賜名孚敬，字茂恭。孚敬遂以賜金作堂於寓所。上又以獻皇帝手書榮恩堂，裝潢成軸，御筆金書。皇考手澤以扁公堂，賜銀印篆曰永嘉張茂恭印。又賜孚敬茂恭御書大字二幅，是年雷震午門西樓，乞休，賜牙笏公服，比抵家而西苑工完，乃遣布政黨以平賚，賜銀幣。上念公不置，又遣行人周文燭賚勅取復任。壬辰，命兼太子太師、華蓋殿大學士，復乞致仕。癸巳，差少卿陳

璋賚 勅起取復加少師再給三代誥命封贈如制
賜銀印二是年 皇嗣生賜銀幣甲午 命有司爲
作樓於府城以藏 御書文劄 賜額曰寶綸又命
工部置扁差署丞朱守宣賚送乙未兩考 賜勅獎
諭廕一子爲中書舍人以疾再乞休致差行人周文
光御醫袁遷賚 勅送還鄉月給廩米歲撥輿隸有
司時加存問丙申差錦衣衛千戶劉昂賚 勅視疾
諭疾愈還朝至處州疾作遂回再起至金華疾又作
已亥二月六日疾革遂不起

王世貞傳曰公浙之永嘉人貌魁傑有大志二十四而舉於鄉數上禮部不利歸而聚徒教授姚溪山中扁其讀書所曰羅峰書院人或謂公去諸生何幾而書院爲笑曰諸生不當書院邪遂爲諸生祭酒蓋又二十二年而中禮部試而武廟方南巡明年世宗皇帝卽位始臨軒策士公得二甲隸事大理時上以興世子入繼大統下廷臣議所以尊崇獻皇帝若后者久之不決公乃上書大略言上以世子入繼武宗皇帝統非繼武宗嗣也今以後武

宗則弟以後 孝宗孝宗自有子奈何舍 獻帝勿
考而考 孝宗使 獻帝有子而無子 上有父而
無父哉 上心是之而迫於輔臣禮官議已報聞公
亦去而爲南京刑部主事因下議上書爭之曰是二
本也 孝宗法得稱皇帝伯考不得稱考 獻帝得
稱考不得稱本生因上所草或問二篇於是桂文襄
公夢疏亦上其如公指而中外士大夫側目而視公
且齟齬之矣然 天子益以心動方公獻夫霍公韜
輩益推緣公說而進之 天子用以連挂輔臣禮官

口凡三下詔始定。召公與桂公超拜翰林學士。雖以驟顯重。然猶不能容公卿間。而益侃侃自發。舒亡所避。天子愈器之。明年進詹事。爲經筵講官。又明年遷兵部右侍郎。俄轉左學士。侍經筵如故。遂爲禮部尚書兼文淵閣大學士。輔政。領都察院。賜勅諭。約束中外御史。所以褒獎殊至。賜玉帶。尋賜銀記二。得密疏言事。明年加太子太保。公以上未有太子。官不當設。乃改授少保。上已尊崇。獻皇帝后錄前。後諸臣議而取衷于公。書成名之曰明倫大典。進公

少傅太子太傅吏部尚書謹身殿大學士予四代
官一子是時楊文襄公一清居首揆以才受上知
然不能如公深而上之所密問公月以十數時時
稱公別號及字桂公亦入輔名寵俱當公亞所言事
不能無相左以故稍不平爲惡語交關上前楊公
得因是以間公詔公暫歸俟用而桂公削保傳以
免公歸至天津而上念之卽詔行人召復相公
公入而楊公爲霍公所論逐矣上怒楊公甚欲置
之詔獄公力爲寬解得免上嘗諭公曰留都天下

首地而事皆中貴人專之何悖也擇宗室一人留守
便公言高帝以親王領宗正不久而罷之宗室不
預政久矣臣不敢奉詔自是乃數數言中貴人暴橫
狀上爲悉裁革鎮守監鎗市舶之類大功後先殆盡是
時上日事經筵作敬一箴及宋儒五箴註皆發之
公天下欣欣望太平而公又自言禮起上以明聖
述作爲任事取公裁定若分祭天地南北郊尋壇於
東西爲朝日夕月正先師號易像而主帝后行耕蠶
禮皆其大者居第成以獻皇帝手書含春堂及金

帛羊酒賀而所讀書姚溪山中者書院下有司爲新
之賜名曰貞義其堂額曰抱忠時夏文愍公亦以言
禮貴驟當上意於公不能盡合而會雷震午門西
序有言公橫者乃乞休比行上賜公服牙笏以識
意歸無何召復位進兼太子太師再乞休再召
進少師時昭聖皇太后于上有推立恩而上
所生章聖皇太后日重昭聖猶以故事裁之
上不懌而昭聖之弟昌國公鶴齡建昌侯延齡早
倖橫燕中所爲多不法燕中少年微知上指乃上

變告其詛厭怨望大逆殺人事下獄按皆誣罔獨延齡殺人頗有狀上益怒遂欲坐延齡反族其家公以爲延齡殺人抵償當而坐之反族不可夫延齡財虜耳何以能反凡數詰問具對如初乃論延齡殺人罪屬秋盡當論公復與其僚方公上疏謂昭聖太后春秋高卒聞延齡死能不內傷痛乎萬一不食有他故何以慰敬皇帝在天之靈上恚謂公自古強臣令君非一若今愛死囚令我矣當自悔不從廷和邪廷和者初持考敬皇帝相也上故爲重語

欲以惕止公、公持不巳、乃下詔、悉緩諸當論者、而終
公與、太后世延齡得長繫矣、公爲相、務以明、天
子尊信國威、重輔臣體、其初潞州盜陳卿據青羊山、
殺官吏、中外頗務姑息、而公獨破之、卒捕誅卿、大同
叛卒殺其將、公薦劉源清、郤永爲大帥、以必得賊爲
主、而所薦頗不任帥、賊挾虜以重、僅購其黨、自相殘、
得一二主謀者、夏公以撫之說進、而公稍屈矣、公有
子中書舍人遜、志賢而夭、哭之成疾、乞歸、上謂公
胡忍舍朕也、得無以言故邑邑、幸寬之、蓋謂夏公也、

公抗辯不置然自是乞歸益力而上益厚公至手調藥以賜曰古有剪鬚和藥者吾手調亦庶幾焉其專精神加食自愛以輔朕爲忠之大公感泣疾益甚以死誓歸上知不可奪乃許致仕歲給八騶月俸米八石公歸明年上使錦衣緹騎帥視公疾且促還朝公強起至處州疾作歸再起至金華疾復作蓋又三年而卒春秋六十有五上時幸承天聞訃爲哀慟下書褒揚甚至贈太師謚文忠按公在公車最久而其成進士僅六載而拜相天子之所以禮信

之者、自明與無兩焉、凡所創革典制、雖上自信以
天啓而得之公者深矣、公博洽典籍、所撰對班班可
據、其所以合非偶然也、公歿未幾、居第侵風雨、力不
能飭、而孫多假貸於人以食、嗚呼、此不可觀公哉、公
別號羅峰、所爲名書院者也、最後上呼羅山、贊
曰、公相而中涓之勢、絀至于今垂五十年、士大夫得
信其志於朝、而黔首得安寢於里者、誰之力也、夫禮
失而求之心而已矣、王子曰、凡言禮而貴者、其人才
皆磊磊、卽不言禮、亦有以自見。

許文簡曰、公天性孝友、氣度朗豁、博極羣書、奇偉迥
特、非時俗庸淺所能揆測、及當事蒞政、執法以往、剛
崛不回、遭遇 聖主、建明大禮、乃知殷宗思治、夢帝
賚傳、周宣中興、獄降生申、有由然也、

吾學編曰、余見學士大夫多訾李公、豈其然哉、豈其
然哉、文正爲政、值奸凶、隕名毀迹、保護善類、卒之日、
諸門生故吏、醵金錢爲葬具、不一二年、家人不免于
凍餒、余嘗過其門、蕭然四壁、不足當近日輔臣一宴
會之費、楊公文武兼資、處瑾、永、張、桂間、固有深意、非

直任權術其濟不濟命也。席公早自修檢才諳學識又足展其志意所至注措有善譽。張公晚年發憤抗朝議受知聖明得柄用攬才俊謝苞苴孤立行一意元侯中貴戢戢歛束要亦有以服其心矣。

永史云張璪抗疏言時議欲考孝宗而叔興獻

王者拘定陶濮王陳迹耳。漢哀宋英立爲皇嗣育之

宮中猶有父子之道。今皇上以倫序當立循繼統

之義非爲孝宗後也。稱興獻以皇叔鬼神旣不

安矣。稱聖母以叔母得不爲皇上臣乎。謂皇

上以繼統而尊崇其親則可謂以繼嗣而自絕其親則不可。帝熟覽之喜曰此論一出吾父子獲全矣。遣諭廷和曰此議寔遵祖訓據古禮爾曹何得誤朕。廷和曰書生不知國體復持上又云甲申三月帝召張璁等詣京都御史吳廷舉恐璁等復倡初說請勅諸王及兩京耆舊大臣各陳所見以備採擇璁等復上言統嗣之辨且曰今日加稱不在皇不皇寔在考不考若爭一皇字則執政必姑以此塞今日之議帝御平臺召冤紀宏諭加尊號及議建室冤對曰臣

願陛下爲堯舜不願爲漢哀。上曰堯舜之道孝弟而已矣。冤等不能對。時黃綰亦申摠議。帝命草勅加尊號。戶部侍郎胡瓚言大禮已定。席書督賑江淮實關民命。不必徵取。上從之。併止摠等摠時已至鳳陽見邸報。乃上疏極論兩考之非。且云本生二字決非聖衷所裁者。此禮官陰術似親之寔外之也。亟去二字。繼統之義始明。帝復命召蔣冕曰。二人來必撲殺之。帝趣使來。以席書爲禮部尚書。又命必加孝字。去本生母三字。冤爭曰。孝字唯用于祖

廟祝文今稱長子已竭孝思復加以孝有干正統本
生母係勅諭擬定亦難遽刪已酉上昭聖冊曰昭
聖康惠慈壽皇太后庚戌上興獻帝曰本生皇考
恭穆獻皇帝后曰本生聖母章聖皇太后布誥天
下時張璠至東昌見之歎曰執政欺上忍至此乎
兩考並稱綱常愈紊不可但已又云萼等至京臺諫
交章請與席書並罪章十餘上璠請上親臨便殿
集執政禮官聽臣等各據典籍面議兩考之非再詔
之誤科臣張璠取先後章奏請發刑部擬罪尚書私

語曰、若得俞旨、卽撲殺之。帝稍聞、遂陞桂萼、張璁、
爲翰林學士、方獻夫侍講學士、喬宇言、桂萼偏執異
說、搖動人心、請罷黜。帝切責宇、遂求去、從之。璁、
列十三事以上、一曰、三代已前、無立後之禮、二曰、
祖訓不言立後、三曰、孔子射於矍圃、斥爲人後者、四
曰、遺詔不言繼嗣、五曰、禮輕木生父母、六曰、祖
訓稱天子爲叔伯父、七曰、漢宣帝、光武俱爲父立皇
考廟、八曰、朱熹嘗言、定陶事爲壞禮、九曰、古者遷國
載主、十曰、祖訓皇后治內、凡外事無得干預、不宜

假。昭聖懿旨十一曰。皇上于 大行壽安太后。不得率天下終三年喪。十二曰。新頒詔宜改正。十三曰。臺諫連名章疏。勢有所迫。禮官欺妄。罪不可追。疏入。何孟春復爲論條辯。帝切責之。帝采璵議。遣諭紀等去。本生字。紀復力爭。帝御平臺召紀宏珪責之曰。此禮當速改。爾輩事君不以忠。朕亦不以禮處爾輩。無君乃欲使朕無父乎。紀等惶怖而退。又云。九月己亥。帝奉 章聖皇太后謁見 世廟。帝諭撫臣曰。聖母欲謁 世廟。卿謂何如。宏一清曰。

國初禮制皇后初謁太廟永樂時改謁奉先殿以正乾坤之位謹內外之防帝問璵璽對曰唐開元禮有皇后廟見之儀國初皇后謁太廟內外命婦陪祀永樂止謁奉先皆當時禮官失考非祖制也皇太后中宮宜先見太廟以補前禮之缺次謁世廟以成典禮之全

席

書劉龍曰高皇帝準古廟見禮爲大婚册后之制未及施行復定册后止謁奉先殿璵璽所引俱婚禮今行大祭禮不可附會璵璽曰周王宗廟之祭王服袞

冕而入立東序后服副禕而入立西序九獻各四拜
是天子與后共承宗廟也 皇上毅然舉行以復古
帝王之盛未爲不可因具儀以上席書等不能難乃
請 聖母謁廟必 皇上同行以主斯禮從之又云
初費宏議 世廟樂止用文舞隨全何淵言武舞未
備宜議定一清詠鑾及侍郎劉龍言 高帝以武功
定天下故奏武德文始之舞惠文二帝止用文始昭
德世廟不用武舞未爲缺典張璁曰王制祭用生者
爵 尊 獻皇爲天子父樂顧可缺耶且天子

八佾爲人六十四、諸侯六佾爲人三十六、國朝大廟
文武舞各八計一百二十八人、王國宗廟文武佾各
六計七十二人、獻皇在藩已用七十二人矣、今追
王而僅六十四人、可乎、桂萼言周禮以司干掌舞器
祭統以翟爲樂之賤、蓋音貴人聲而容貴干戚、則去
武舞者、去所貴也、而可乎、帝曰、爾據經籍推論甚
明、朕心甚嘉、不用武舞、寔爲缺典、其卽增之、又云、
上與輔臣從容評騭、諸臣曰、張孚敬忠誠才略、但不
惜人才耳、人咸服、上藻鑑又云、張文忠其徇國之

純臣振古之人傑哉當議禮時舉朝元老公卿百執
事三百餘人羣然一詞而上援孝廟近庇昭聖
口執程朱之成說至撼門伏闕哭聲動地其景象何
似而以一新進郎佐屹立其中不懾不悚詞嚴氣壯
卒破千古之謬成聖主之孝張寅大獄盡割法吏
成案活一家數十無辜之命以摧蔽主植黨之奸豈
世俗億億仞者埒哉既荷知眷驟列台鼎慷慨任
事署都察院而申明憲綱糾正下吏風紀肅然在內
閣持議正直雖屢蒙嚴責而剴切益堅密謨讜論同

列多不與聞、清勳戚莊田革、侯伯世襲罷、鎮守內臣在閣十年、不進一內臣、不容一私謁、不濫蔭一子姪、吏兵文武二選、所指爲內閣質庫者、未嘗有纖芥之私道、有不合、卽奉身而退、衣囊一篋已、渡潞河、旣有溫旨、旋踵復入、以行李鮮而內顧輕也、嘉靖末年、華亭當國、世亦共以爲賢、然莊田美屋、跨州郡、出京之日、大車幾百輛、彌月不輟、方舟而下、連數百艘、於文忠何如也、霍文敏素伉直、不輕予人、而獨重文忠、以此。

太傅席文襄公

席書字文同四川潼川州遂寧縣人弘治庚戌登進士授剡城知縣陞工部都水司主事差督漕船于清江廠著漕船志具見綜理之才通變之學矣十四年改戶部山西司主事歷河南司員外郎會雲南晝晦五日朝命考察雲貴官員書具疏云災異係朝廷而不係雲貴在大臣而不在小臣因條奏時政數千言孝皇欣覽貼置座右十八年出爲河南僉事正德四年陞副使提學貴州時王陽明謫龍場驛書

每學擇其秀者一二人集省城書院事龍場爲師士始得聞正學焉李禿翁曰卽此一事公之才識已足蓋當世矣當是時人之尊信朱夫子猶夫子也而能識朱子之非夫子唯陽明之學乃真夫子則其識見爲何如者然有識而才不充膽不足則亦未敢遽排衆好奪時論而遂歸依龍場以驛丞爲師也官爲提學而率諸生以事驛宰奇亦甚矣見何超絕志何峻卓况不虞賊瑾之害其後乎六年陞河南叅政丁憂八年起復陞浙江按察使九年陞山東右布政使再

丁憂十二年補雲南右布政使十三年陞福建左布政使十六年陞都察院右副都御史巡撫湖廣尋陞南京兵部右侍郎嘉靖二年南直隸大饑戶部議發銀賑貸書上疏謂江北淮揚廬鳳諸郡災傷爲甚蘇松常鎮次之徽寧池太又次之執政始知狀議遣大臣往賑會書適上賑粥要議衆喜曰此任當屬此公也命兼僉都御史賑濟江北時餓莩塞途至人相食盜賊莫可制書被命講求時宜謂給散銀米實滋弊端且饑民命在旦夕若待編審事定將無類矣設

粥。則所賑皆貧民。乃將州縣每十里爲一局。先發見銀市米爲粥。饑民趨之。盜賊漸鮮。乃以奏截運儲。及戶部所發銀。給粥兩月。饑者少甦。始定議銀米間月兼給。沾寔惠云。甲申春。南刑部主事桂萼以書及方獻夫大禮疏錄奏上。下其疏議。特陞禮部尚書。初。廷臣執議。謂今上宜考孝皇。毋昭聖太后。父母稱本生叔父。妹。上勉從之。旣下詔。終以爲疑。書及張璁。霍韜抗議。謂上以聖祖兄終弟及之訓。入繼大統。非爲人後者。尊號宜具實。以稱爭論數年。

幾成聚訟至是上下書等及廷臣先後所奏會文武百司集議於朝衆論既定卒如書等言大禮始告成尋加太子太保丙戌會試知貢舉舊廷試內閣所讀卷多取入一甲二甲九卿分讀者則以官爵爲次雖好卷亦不能置前列書具疏言廷試以收人望服士心請明旨痛革廷試一大弊上是其言六年加少保兼太子太保禮部尚書兼武英殿大學士入典機務未任而疾亟遂卒書才識敏決文章政事亦卓然可稱其學專右象山而抑考亭嘗著鳴冤錄以

明象山之寃識者韙之

一清誌銘略曰嘉靖丁亥春二月少保兼太子太保禮部尚書席公以目疾久未愈求致仕先是凡三上疏乞休不允至是上曰卿學行才識朕所簡注方賴輔成化理而卿疾彌留志不可奪特加武英殿大學士以示優異然不遂欲卿遠去賜第京師月俸支如故蓋自國初以來文臣得謝恩禮之優未嘗有是命下而公卒是月十日也計聞上悼惜贈太傅賜謚文襄諭祭九壇初喪文出親製備述君臣始

終之義、聽之感動、給官舟、遣行人馮震護喪歸其鄉、
凡葬事、則遣工部主事張淑督有司治之、又官其子
中爲尚寶司丞、卹典之優、亦前此所未有、嗚呼、上
之所以待公者如此、地下有知、亦可以自慰矣、按公
之陞河南按察僉事也、歲大饑、撫按議賑、時鎮守中
貴甚橫、督修黃河諸工役、朘削無算、所在騷然、公曰、
第停工役、禁尅削、不煩賑濟也、撫按從之、而民稍安、
後遷福建左布政、宸濠之變、公募軍二萬赴援、道聞
賊平、乃歸、又建道山書院、以祀閩中諸賢、皆千古偉

事甲申春、世宗入繼大統三年矣、再命遣官徵公入京、憾公者、乃咸謂賑粥非善、謗議紛起、公疏乞終事、三月、特陞禮部尚書、公疏辭不允、南北言官交章劾公、公又疏乞休致、以全臣節、溫旨褒答、仍命吏部趣公、五月、公再疏乞休、并上所撰大禮考議有謗、公侵賑濟銀者、公乞差官覈勘、上遣近臣偕戶部及法司會查、已明、公復疏乞放還、不允、使者催趣相望於道、公不得已、北行、至德州、聞百官伏闕被逮繫、公上疏乞宥學士豐熙等不許、仍趣其來、八月、至京、

陛見而言官復有所劾、公杜門、三上疏乞罷、俱不允、不得已、出視事、乃上所修大禮集議四卷、纂要二卷、卽蒙降手勅、加太子太保、賜白金五十兩、紵絲衣四襲、頒其書於天下、梓行之、五月、偶感暑疾在告、目漸失明、又具疏辭、上遣中官齎賜牲酒食米瓜菜來問疾、又賜詩遣官慰問、以獻皇帝實錄成進少保、兼秩如故、賜白金文綺鞍馬、公以世廟告成、宜儆、宋郊祀覃恩、將先日議禮、獲罪諸臣、從寬矜貸、詔褒荅、又疏舉禮部尚書起復羅公欽順自代、嗟嗟、公

立朝僅歲有餘耳、居常以卑自牧、至義所在、則勇往直前、無所忌避、言若不出諸口、至當大事、決大疑、發幽析紛、則極其明辯、衆莫能奪、跡其行履、素孚於人、宦轍所至、聲聞藉甚、部使者剡薦、未嘗不及、官至侍郎、尚書、計日可得也、而直以議禮之疏、與衆不合、譁言遂興、一倡百和、牢不可解、公方自信不疑、謂公論在萬世、不待辯而達、禮君子固有先得公心之同然者矣、初、桂公疏上、或勸公宜勿承、不然、忤衆、且得罪、公不肯、以書質予、予復之曰、公旣實有此疏、今安得

不承亦據其所見者耳何必同比尚書命下或止公
不宜來予曰上命若是公不去恐衣冠之禍起矣
比公入朝聖心悅懌上下相安消重禍釋隱憂不
可謂無功也是時上方圖新政理公特被知遇假
之歲年所建明樹立可量哉天顧喪其明又遇其年
使不克大究厥施以沒嗚呼其命也夫銘曰唯士窮
經或不達於政公以經術飾其政令析繁舉劇心得
手應而要其終卒歸乎正雷風舂撞衆恃公以定士
有從政或未閑於禮公執典禮以佐天子謂禮弗

昔如跣地弗視羣咻奈何曰有人紀匪衆之狗唯權
度在已我求天知亦求同理食少慮多云胡不傷能
喪其目不能奪其明煌煌禮書匪裁曷彰有命在天
公不起在床帝聞曰嗟我鑑斯亡曷顯我忠曷遂
我良辭以誅之公雖歿有耿光稽行易名無忝文襄
永史云席書疏曰禮官之議舉朝是之臣未敢以爲
是璫韜之議舉朝非之臣未敢以爲非昔舜繼堯統
禹繼舜統未嘗不以瞽瞍爲父也皇上尊爲天子
而父母無尊稱果人情乎此非周武追王之心也今

唯定號 皇考興獻帝立廟大內祀以天子之禮則
大統正而昭穆不紊矣吏部員外方獻夫疏曰 陛
下之繼二宗當繼統而不繼嗣 興獻之異羣廟當
稱禰而不稱宗請改 孝宗曰皇伯 興獻帝曰皇
考別立廟祀草具未上適南刑部主事桂萼與張璁
議合乃言臣按范純仁論英宗親許爲仁宗子 陛
下入繼大統果許爲 孝宗子乎且 孝宗有子更
爲立後 獻帝一子乃以出繼皆非也臣見席書方
獻夫皆以具疏故不敢復贅迄今未奉 宸斷豈

皇上未經覽邪抑二臣未果上邪謹錄以聞上曰
此關係天理綱常仍會羣臣集議

太師徐文貞公

徐階字子升華亭人嘉靖壬午中應天試明年賜進士第三人授編修與告歸癸甲申丁外艱服除復故官會永嘉張公議撤孔子像下儒臣問狀衆莫敢持異公條具三不必五不可狀上以不奉詔罪公廷多申救者得勿問謫延平推官至則毀淫祠剏社學清久繫獄囚以文致入者咸得平反盜阻尤溪爲亂監司以屬公乃設方略窮其窟穴旬日而獲其渠帥并餘黨百二十人滿三載遷黃州府同知未任擢浙

江僉事督學政又三載陞副使改督江西學稱述王文成所著說因像祀焉會皇太子出閣選官寮改洗馬兼侍讀下內艱服除進祭酒爲籍籍諸生淑慝月朔廷誦之以吉服受淑籍素服受慝籍然有曖昧失者亦務覆蓋之諸生以故人人感激相戒勉久之擢禮部右侍郎尋遷吏部故事吏部官率鐫門示重公以爲不能盡人才破例延訪無倦署部事所推轂不用刻深儼捷者而用愿厚長者常引以爲賢於已當大計所貶退能不以衆口爲定天下翕然稱賢未

幾兼學士、掌院事、尋擢禮部尚書、莊敬皇太子薨、公
議喪禮稱上旨、上察公慎勤、召直無逸殿、公遂累
請立皇太子、不報、庚戌虜闌入塞、薄都城、中外震
恐、公請出罪、戴綸、李珍於獄、復其官、俾敵愾自效、又
密言虜間潛入、請上還大內、備非常、上雖難於
還、而心念公忠、會中涓陷虜歸、爲虜乞貢、上幸便
殿、問羣臣、公曰、賊深矣、不許激怒、許則操左券以責
我、臣請計緩之、上曰、何謂緩、公曰、遣辯士風諭以
無文故、且徵其情實、實則令聽命於甌脫、爲外臣通

貢市往返少日，我備完而兵益集，虜且退，不退從而拒之，其勢必得所欲。上稱善，因請上視朝，會廷臣議。廷臣皆言貢非虜始意，許之。愈一小快耳，而墮軍威，長虜志，不可。居數日，勤王兵集，虜亦退。時聶公豹以副使坐法戍，豹令華亭公爲弟子，悉其木曰：欲威虜，非豹不可。卽日薦起行伍爲中丞，公上言：延安卒善戰而雲中卒善謀，宜各用所長。上從之。時以朶顏三衛爲虜耳目，請顯責之。公謂三衛導虜有其情而無其迹，罪之不可，置之不可，不若責以扞圉失。

職使彼易受而後撫之。上以爲然。自是言便宜者率密諮公。公寢益任用。太宰缺。廷推公。上曰。階素內直。柰何中道而棄之外乎。亡何。孝烈祔廟之議起。初。孝烈方皇后自九嬪冊立。庚子宮闈之變。有翊護功。上德之。旣崩。始謚曰孝。尋易今謚。一日。上忽諭禮部議祧。仁宗而以孝烈主祔廟。公言。女后不宜先入廟。宜祀之奉天殿別室。上盛怒。趣公再議。公不得已。遜言曰。祧廟乃聖子神孫事。臣子之心。何忍煩。上親議。無已。宜倣古廟數。遞加之。益

太廟奉先殿各一室令仁宗緩祧而后先祔或可
上不許竟祧仁宗祔孝烈然天下皆以公議爲
正未幾加少保兼東閣大學士上欲罷入衛卒公
言其非計又請汰營兵老弱者而取其餉以充賞賚
倡勇敢皆見納一品滿三載進在國太子太傅癸丑
主會試時倭事起公上疏調將校主戰而守令主守
今將校北輒用軍興法而守令無恙及城潰矣復坐
將校死而僅左降守令是文武異刑而法不一也民
進止視守令不視將帥今兵一而民百柰何以戰守

併責將帥將校履肝肺以死。而文吏持口舌以制難。以責其振矣。夫守令勤則餉峙具。守令果則哨探嚴。守令警則間不容。守令仁則兵必力。臣以爲重責守令可也。公又請罷浙江撫臣與更江南督臣皆報許。公念虜盜邊士不得田畜宜大米麥買無所得而戌卒月餉七鍰僅易粟二斗時畿甸二麥熟石止直四鍰可及時收買數十萬石石費五鍰可出居庸抵宣府費八鍰可出紫荆抵大同大約合計之費中金一兩而飽士卒一月其地米麥價且漸平。上如其言。

給事中吳時來、刑部主事董傳策、張翀極論嚴嵩罪狀。嵩念公于吳、張俱座主、而董又鄉人於上。前具道本旨所以爲者。上下三君獄考掠無所得。三君遠戍。公獲解。尋加太子太師。相嵩所以危公百端。無如之何。會上所居西苑永壽宮災。徙居玉熙殿。隘甚。公朝夕傍徨曰：「此豈至尊安居所？」乃請掄三殿餘材營之。數旬而宮成。更名萬壽宮。進公少師。時分宜姦益露。上久而察公忠。密札諮問。交午公所。鮮及分宜矣。居無何。御史鄒應龍疏論嵩父子不法。

上勒嵩致仕下其子世蕃獄戍之擢應龍五品京職
上雖退嵩而心憐之忽忽不樂手

諭公欲傳嗣令

擬詔公謝不敢而吏禮二部奏遷應龍通政叅議
報可矣忽有旨切責二部臣以應龍爲邪不宜官

公爲之闢說應龍得無恙上亦悟輟嵩直廬賜公
公旣居首揆盡反嵩政務收人心用物望嚴杜筐篚
天下翕然想望風采初嵩在事操權自利六卿皆束
手公盡謝却之或謂非宰臣體公曰夫操表掇以晞
望者而亦負畚荷鍾耶前是奏軍功率賚閣臣公以

爲不稼取禾、無以示勸、自是報捷不復與賞、將作大匠徐杲有殊寵、上欲崇以宮保、公力持、祖宗無是法、無啓倖端、上默然已、十五年滿、加上柱國、固辭、公體小惡、上親爲調藥、溫諭諄切、方士熊顯等進長生藥、公力言不可餌、又問公、比日乩何以不下、公謂此曹持紫姑術、實得於衆口、而托之神語、未宜深信、上由此亦怠厭方士之怪迂語矣、大虜由墻子嶺入寇通州、報至、大司馬楊博以上方有竹宮祠、不敢奏、而便宜令關門戒嚴、虜阻白河水、退掠

香河公請亟先備順義而以奇兵徼之古北口虜果走順義不能入出古北口遇伏大敗天子創虜恨司馬不早計博危懼公從容言博悉兵情盡力縣官上始解公以張家灣當天下委輸請出光祿美金三萬城之設一裨將始爲重鎮穆宗在裕邸而景王未之國愛幸日異姦人謀欲更樹公力稱引古今調護萬端景王卒就國異議旋息公力也上下制建雩壇及更興都故宮殿公第以藏置爲言工遂已天下鹽額淮揚最重歲賦六十餘萬金嵩當國今

都御史鄢懋卿出經理搜積羨得百萬以爲功遂著
額額不登商多亡匿急則雉經公請仍其舊流徙悉
復而額盡登先是分間以上僨事輒以緹騎逮所至
爲暴公在政地省減十九其後益不復遣戶部主事
海瑞上書斥乘輿上恚甚逮詔獄欲殺之公疏
言瑞草野倨侮然不過仰恃聖明以死沾直名耳不
如置之則彼計失而聖德益廣瑞以是得毋死
上久疾欲幸興都公以保聖躬防姦宄爲對語甚
切至上崩穆宗卽位公推先帝意罷齋醮土

木復諫諍得罪諸臣舉士有節行及恬退久廢者所
草登極詔孳孳急民和天下翕然想望太平矣公明
習典制中外倚重上欲幸故邸公言祖宗時非
郊祀幸學耕藉駕不出今諸大典未一行而先幸
故邸可乎上嚴公雖不輟幸而以頃刻歸矣亡何
御史齊康受新鄭旨力詆公公引咎乞休於是九卿
大臣皆爲公辯雪而臺諫因劾康并及新鄭新鄭竟
以此去位康亦遠謫而公少安時有中旨令館臣撰
中秋致語公謂先帝新棄羣臣非宴樂時臣不敢

奉詔 上於是爲罷宴 上謁陵甫至齊宮而使中
貴以意問曰祀在次日欲輕騎一出觀形勝可乎公
曰 上以祀來乎以觀形勝來乎以祀來則先游而
後祀非所以展孝思也 上竟以祀畢出觀 上欲
以太監李用等分監營兵又命修內教場勒中貴習
騎射公持甚力 上難公乃止一品九年再滿力求
去 詔慰留加公伯爵俸固辭久之乃視事 上欲
幸南海子公諫不聽又與中使李芳忤遂稱病不出
御史張齊因汙公姦利六事公再疏辭獲允公還里

杜門自守而新鄭再起以舊事銜公乃出其黨爲監
司郡守伺公引繩批根而生平與公有睚眦怨者皆
乘是侵公公怡然不校會拱敗獲免甲戌孫元春舉
進士每戒之曰無競之地可以遠忌無恩之身可以
遠謫咸謂名言壬午公年八十今上使使存問賜
諭優渥鄉人榮之公雖材器天成而實本之學自爲
諸生卽從聶貞襄公切磋理道其後與歐陽文莊公
輩推明王文成良知之旨相爲磨淬然獨不事口耳
而以躬行爲實際以經濟爲真詮故其發於事業光

明俊偉、非俗儒所可彷彿、生平無姬媵之侍、無臺榭之飾、兄弟惇讓、肫肫無僞、田宅錄廕、輒以推分弟姪、癸未閏二月二十六日卒、年八十一、贈太師、謚文貞、所著有世經堂集二十六卷、又手校錄程純公言若干卷、公爲文有根柢、嚴於法度、不爲無益語、王司寇稱曰、世廟如白日之麗天、而忽爲震雷迅霆、公徐劑其震迅之勢、而爲霖雨、穆廟如白日之麗天、而浮陰時時翳之、公直解駁其陰翳、而復爲白日、人以爲知言云、

少保趙文肅公

趙貞吉字孟靜號大洲蜀之內江人生而神穎六歲誦書日盡數卷年十五讀王文成傳習錄驚曰予固疑物理之遠於本也今獲所歸矣白二親往從不許遂遍誦六經自求之嘉靖戊子甫鄉薦走謁故相楊文忠里第文忠稱曰是社稷器也明年下第歸太夫人逝泣曰人世颺忽若是遂兼修出世業習靜古剎不櫛沐解衣者數年父資政公強令赴試舉禮部廷對都御史王公廷相撫其卷曰雖治安策弗能絕也

上嫌其語直置二甲尋悔之乃首列庶吉士特旨留館授編修公感上初年銳意聖學後稍惑方術遂上求真儒贊大業疏執政不懌公日與同志徐公樾輩切劘踰歲謁告歸蜀爲多士發明大學致知本旨蜀士知有問學出咕嚕上者自公始也二年開封三年教司禮監同修會典充會試同考試官又三年遷右春坊右中允管國子司業事當此時天下士高者固守物理紛若射覆一聞知本之學反加詆訾於聖門性道之旨莽如也公慨然曰學之不明未知性也

進諭六館士首揭中庸性道教爲訓諸士聞之懽然
舊習若濯而新是歲爲庚戌公語當事者曰虜將大
舉盍爲防禦計八月虜果闌入古北口由通州薄都
城公乃上破虜疏是時虜方有求貢嫚書入朝上
詔禮部尚書徐公階集百官議日中莫有發一語者
公獨出大言曰城下之盟春秋耻之且旣許貢則虜
必入城要素不已卽内外夾攻胡以禦之徐公曰足
下必有奇畫公曰爲今計請主上出御正殿下詔
引咎錄周尚文之功以勵邊帥釋沈束之獄以開言

路輕損軍之令、重賞功之格、飭文武百司共爲城守、遣官宣諭諸將、監督力戰、其他無可爲者。上已偵知、公言、手詔嘉公壯猷、陞左春坊左諭德、兼監察御史、領勅宣諭、并給銀、惟所措。然勅未有督戰語、可統攝諸將以行也。公以請于相嚴嵩、嵩故有郤、又其黨趙文華素銜公、冀相齟齬而甘心焉、故不與事權。卽兵曹一護卒不可得、時虜騎充斥、公單騎出城、先詣總兵仇鸞營、次過諸將、宣上旨激勵、付賞功銀。一時將卒感奮、惟趙國忠一營駐沙河、隔虜則屬鸞傳。

諭而公以詰朝入城復命方公之入也仍欲上請督戰已撰有疏草矣而鸞陰畏公至遂令人請備膳疏故爲遲之公入朝趣疏不來獨以宣諭事畢奏上上怒謂公領銀未覩措置第爲尚文束遊說詔錦衣逮杖落職補廣西荔波縣典史癸丑量移徽州府判稍遷南吏部文選司主事未至進郎中乙卯陞南光祿寺少卿遷南通政司叅議先是嵩已嗾吏部推公藩叅因上問趙某何在故有是遷丙辰陞南右通政明年陞南光祿寺卿聞三殿災公移書執政言

大工復作，不宜提編加賦，重困民。嵩見大忤。又三年，乃陞公南戶部右侍郎。時公已聞計歸，服闋，改戶部右侍郎抵任。上屢遣代祭，示優眷。嵩滋不樂。亡何，有建議薊州增設戶侍一員，督糧練兵者。嵩以屬公，且召公酒，詭曰：「是行非公不可。」公曰：「人臣之義，死生以之，復何諉哉？」酒半，公徐曰：「今欲戶侍督糧，督京運乎？抑民運乎？若二運已有職掌，卽部中與出薊州何異？添官徒增擾耳。況兵之不練，其過宜不在是。縱十戶侍出，無益練兵也。」嵩作色怒，且罷。適嵩告，上

手詔次相徐公問荊州事徐對以查理當用習邊糧者吏部因得易管理爲查理而以林侍郎行蒿出愈忿公而詬林侍郎嗾其黨張給事益劾林不數日并劾公竟奪官去公平日持論以二氏學通吾儒謂必出世乃可經世道汴遊嵩高抱犢伏牛諸山巡撫蔡公汝南逆而問學公遂列爲圖明三教之所繇起曰儒者見之曰儒仙者見之曰仙佛者見之曰佛其實一也蔡梓以傳公家食多居玉溪莊嘗爲諸生申致知之旨又爲講說人心道心精一執中大要以中卽

性命卽天則也而後儒乃不識中爲何物至以爲物
物有之是有同於刻舟之愚雕形之苦殊失其旨丙
寅肅皇帝崩公哭最哀曰先皇帝知我隆慶改
元詔起公吏部侍郎兼翰林院學士掌詹事府事
實錄副總裁會有言幸學祭酒坐講當預擇耆德攝
之遂奉旨以原官暫掌國子事八月朔駕幸學
賜坐講禹謨后克艱章上見公闡發精明音吐洪
鬯大爲感動問之知爲新起用臣益喜尋命解監事
充日講官先是北虜陷石州公與執政數議邊事不

合乃求補南禮書、旣行、御史李惟觀、南戶科給事岑
用中、交章言趙某居啓沃之任、可以格心贊治、不宜
置遠地、適上顧講筵無公、不悅、諭曰、前年高往南京
者、仍今日講、遂復以禮部尚書兼翰學、協管詹事府
事、戊辰三月、公還京、會文武邊臣建議欲招練南兵
十萬于張家灣、公執不可、曰、曩南京建振武營、致大
變、今乃欲建十振武營於都城側哉、況燕薊乃戎馬
場、豈藉南兵當事者寤、遂移練兵于薊鎮、惟棟南兵
三千教鳥銃、識者謂爲得算、頃之奉命教庶吉士

仍充講讀纂修、又命代祭先師孔子爲皇太子千秋講、唐太宗喻太子章、賜賚無虛日、時薊鎮奏修敵臺幾千座、公以爲徒費、無裨戰守、因講語中力言之、語具爲執政格、不得上、公遂邑邑懷去志、而上之、眷用意益切、尋詔以原官兼文淵閣大學士、同諸臣入輔大政、一日于講筵謝、上面諭盡心輔佐、公稽首對、臣敢不竭股肱之力、効忠貞之節、第近日朝綱邊防多廢壞、臣欲捐身任事、惟陛下主之、上色益喜、于時上多恭默、而面諭公者再、羣臣謂自臨御

以來所未有、翌日御便殿、手詔閣臣、謂公已有年、當
同任閣事、又撰勅、令中貴捧詣閣下、皆特典也、先是
大同邊臣棄城走、爲巡按暨科道所叅、而閣臣未有
言治罪者、公謂宜照元年山西失事例治之、執政不
得已、乃行巡按覆勘、公爲是遂註籍不出、上聞溫
諭、遣醫賜羊酒瓜菜、公感上睠乃上疏乞解贊輔
重任、退供講職、且言大同之罪、惟祖法國是、公論
清議八字、勘之足矣、今兵部與閣臣俱仍姑息、臣欲
爭論而力不能、故懷慚思退、上亟慰留之、是日、

上以原票還閣中、改擬有不襲昔年虛套之論、而閣中猶以將才難得題復、上姑兩解之、然信公益篤、明年庚午、上言遵祖制收兵權以飭戎務、略云我朝內外兵分隸五府、乃高皇帝定萬世太平計、俾免前代權臣握兵之害、永樂末年、因聚府兵北伐、旋師後、遂結營團操、乃以三千神機二營附之、因號三大營、其實皆五府兵也、正統末年、嘗變爲十團營、弘治間、又加爲十二團營、正德間、又添置東西官廳、然五營之號未泯、而五府意猶存也、至嘉靖庚戌、嚴嵩

欲爲賊將仇鸞地遂請特設戎政廳括內外兵籍鑄
總督戎政印授鸞夫以五府外而別立一廳則盡變
太祖分府之意以十餘萬衆而統於一人則盡變
成祖分管之意向使鸞誅晚則時事之危未可測也
合無將見操官軍九萬人分爲左右中前後五營各
擇一將統之責令開營教習仍以文臣巡覈之每歲
春秋校閱凡將官能否軍士勇怯技藝生熟皆得奏
聞而賞罰行焉要令五營齊成精銳有事則領勅將
兵於閫外事畢則納印歸卒於營中如是則太阿之

柄獨持於上、而輦轂下有數萬精兵、隨所用而可矣。
上曰、分營練兵、乃祖宗舊制、遂下廷臣議行。時本
兵兵科挾前大同事、議遂蜂起、反失公建白本意。
上以公兼掌都察院、加太子太保。時閣臣高拱兼掌
吏部、方欲挾權籠制諸臣、意假公爲分謫地。故推公
兼院事、已而本兵霍冀被科、臣論劾賊私、疑公前議
大同及已、乃於求退疏中誣公主使、公疏辨、欲付法
司、究問以糾官邪。且兩上疏乞休、上不允、乃請給
假、回籍遷葬、不允。拱尤銜故相徐公、欲中以危法、疏

言當時議事臣假托遺詔凡先帝所斥如大獄及
建言得罪諸臣悉加超擢死者贈官廕子是仇視
先帝近於無君又引弘治間彭程事欲有以治之公
拂衣起曰若是則將如宋奸黨碑矣拱色變強留公
乃共改票止於吏部通行曉諭而已又因公言去大
獄字拱以是迄不得逞於徐公後又以故錦衣陸炳
爲徐姻家已嗾張御史追劾炳而刑部以炳一品爵
例在應議列當請勅三法司集議定之奏下閣中擬
票是日拱遲公久不至旣至欲從容商之拱遂徑擬

削爵沒產自是拱與公勢不兩立矣亡何宣太督撫王崇古等奏俺荅孫把漢阿吉等入降公語輔臣李公春芳曰此邊疆幸事已而本兵奏上李公票旨僅曰是公曰大約浮言謂恐開邊釁然自俺荅橫行五十餘年每年邊餉數百萬何年無釁釁不在納降也惟當請暫與降人官職慰來者心其制虜機宜一付之督撫乃同改票如公言與那阿吉指揮使阿力哥正千戶時虜求封貢朝議焚然獨公力主其議亟令督撫姑置封貢事徐議之第令俺荅速獻投虜叛人

趙全等九人易其孫去、且當慎交質、防虜劫盟、又趙王書曰、吾外憐悉怛謀之附人、內恐李文饒之失助、公爲邊計、篤切類此、先是給事中張齊者、爲拱嚙劾徐公、而王都御史因訐齊賊罪、抵戍後齊倚拱辨復力擊王與毛司寇、欲因以傾徐、乃奏行法司、而刑科給事中舒化叅寢不得行、拱懷怒、思一逞、於是考察科道、旨從內出、公曰、是將倚法爲報復計也、疏請止之、拱聞、卽上揭、謂有成命、不當中止、公遂同赴吏部、有給事中吳時來者、故嘗劾嵩、父子謫戍起用、守仇

直不附拱者也。拱銳欲去之，公獨不可爭。至日中，拱知公不可奪，竟從公。以故臺省名士得全者衆。然拱益恨公刺骨噬心，腹給事中韓楫枉劾公。公疏懇乞歸，且曰：願上放臣歸田里，令拱復還內閣。毋久專大權，樹衆黨，別選老成掌部院庶上不悖祖訓，下不紊職掌。上雖眷公甚，而拱交通中外，亟謀逐公。天子不得自持，遂允公。暫還時論惜焉。公行後，虜果還叛人趙全等獻俘禮成。上以公與議，廕一子中書舍人。明年春，公抵家，諸門人請設教聖水寺會。

穆宗大漸公哭臨至哀毀成疾乙亥遂杜門不復會
講第擬作二通遺諸門人內篇曰經世通外篇曰出
世通二通各分二門內篇門曰史通曰業通外篇門
曰說通曰宗通內通之門八部史通部曰統曰傳曰
制曰誌業通部曰典曰行曰藝曰術八部具而百代
九流之緒備矣外通之門四部說通部曰經曰律曰
論宗通部曰單傳直指四部具而頓漸半圓之旨悉
矣所貴俾三千年未經折衷之籍聚爲一書以俟來
哲是歲十月卽開局編述乃爲文祭諸聖賢告始事

其略曰身居臣子之地每懷經世之憂心慕道德之門時發出世之願邇來垂白謝事忽生勇猛乃取舊書以類臚列隨文點布各就部曲約要而言經世者不礙出世之體出世者不忘經世之用然後千聖一心萬古一道聖人憂世之念可少慰矣語具公内外篇都序及貽曾巡撫書中至冬末疾作輟編丙子三月薨春秋六十有九計聞上輟朝諭祭誥贈少保謚曰文肅公孝友天至從總髮與弟蒙古目相師友劉忠英偉稱其氣貌解褐卽身任天下憂先一世雖百

挫不回、至其問學淵源、上探堯孔之微、而并包逮於
伯陽子羽、爰達泥洹、雅自命曰經世出世、其古之博
大人哉、荀楊諸子、未足窺其奧也、其文章不襲人後
而博辨雄深、要歸于道、所著詩文若干卷、進講錄若
千卷、行于世、

續藏書卷十二終